

Visoki predstavnik izražava solidarnost sa građanima BiH

Povodom desete godišnjice kobnih pucnjeva ispaljenih u toku demonstracija za mir na Vrbanja mostu u Sarajevu, jednog od tragičnih događaja koji su obilježili početak rata u Bosni i Hercegovini, visoki predstavnik Wolfgang Petritsch želi da izrazi svoju solidarnost sa građanima Bosne i Hercegovine dok se sjećaju teškoća sa kojima su se suočavali u posljednjoj deceniji i dok sa nadom gledaju u budućnost.

Prije deset godina, dvije mlade žene izgubile su život na Vrbanja mostu, ispred same zgrade u kojoj se danas nalazi Ured visokog predstavnika. U sljedeće tri i po godine brojni građani su izgubili živote a više od dva miliona protjerano je iz svojih domova. Bila je to katastrofa čije naslijeđe će se osjećati još decenijama. U ovoj zemlji malo je onih koji u ratu nisu doživjeli lični gubitak.

Sjećanje je neizostavan dio oporavka. Oni koji zaborave prošlost neminovno je ponavljaju. Visoki predstavnik se pridružuje građanima Sarajeva i BiH u sjećanju na strahote rata, i one sveopšte i one koje je svaki od njih lično proživljavao.

Visoki predstavnik također se pridružuje građanima BiH u njihovim nadama za budućnost. Nakon deset godina, Bosna i Hercegovina daleko je odmakla od nacionalnih netrpeljivosti koje su izrasle u sukobe i od uskogrudosti koja je u godinama neposredno nakon Daytonu onemogućavala oporavak. Građani BiH prerasli su gorčinu rata i njegovih posljedica. Na domak su integracije u Evropu. Bosni i Hercegovini sada se pruža prilika da bude normalna zemlja, čiji građani mogu živjeti i raditi u miru i sigurnosti, čiji su organi vlasti, sudovi i policija sve djelotvorniji i objektivniji, gdje je sve više ekonomskih mogućnosti i gdje se niko ne osjeća ugroženim zbog svoje nacionalnosti ili vjeroispovjesti.

Izrastanje BiH u takvu zemlju, bio bi sigurno najljepši spomenik u čast onih koji su izgubili živote u strašnim događajima koji su počeli prije deset godina.